

Chunga Mandashcacunami

¹ Taita Diosmi, cai tucui shimicunataca, cashna nishpa villajurca;

² Ñucami, Egipto llactapi gañan causajushcamanda llujchimuj, canda Mandaj Taita Dios cani.

I ³ Ñuca ñaupajpica, ama shuj dioscunata charinguichu.

II ⁴ Imaman rijchajcunatapash ama ruranguichu. Jahua pachapi, cai pachapi, alpa ucupi,

alpa ucu yacupi tiajcunaman rijchajtapash, ama ruranguichu. ⁵ Chaicunataca ama cunguringuichu,

alicachitallapash ama alicachinguichu. Ñucami, canda Mandaj Taita Dios cani. Ñucaca, ninan

ushaita charij, ñucapajlla cachun munaj Diosmi cani. Ñucata millanayachij, nalita ruraj taitacunapaj huahuacunata ricungapaj shamushpa, quimsa miraicunacaman, chuscu miraicunacamambash llaquichij Diosmi cani.

⁶ Ashtahuangarin ñucata juyashpa, ñuca mandashcacunata pactachijcunataca, huaranga huaranga miraicunacaman llaquishpa juyajmi cani.

III ⁷ Canda Mandaj Taita Diospaj shutitaca, ama yanga rimanguichu.

Mandaj Diosca, paipaj shutita yanga rimajtaca, ima nalitapash na rurajtashnaca, na yanga ricungachu.

IV ⁸ Samana punllataca, Diospajlla cachun shicanyachinata yaringui.

⁹ Sucta punllata trabajangu. Chai punllacunami, cambaj tucui ima ruranacunataca rurana cangui. ¹⁰ Ashtahuangarin canchis punllapica, canda Mandaj Taita Diospaj samana punllami. Chai punllapica, ima ruranatapash ama ruranguichu. Cambashi, cambaj churipash, cambaj ushipash, canda servij jaripash, canda servij huarmipash, cambaj animalpash, shuj llactamanda shamushpa, pueblo ucupi canhuan causajujpash chai punllapica, ima ruranatapash na ruranachu. ¹¹ Mandaj Diosca, sucta punllacamanmi jahua pachatapash, cai pachatapash, mama cuchatapash, chaicunapi tucui ima tiajcunatapash rurarca. Canchis punllapica samarcami. Shinamandami Mandaj Diosca, samana punllataca bendiciashpa, paipajlla cachun rurarca.

V ¹² Canda Mandaj Taita Dios canman carashca llactapi, unai punllacunacaman causanata ashtahuan mirachijchungu, cambaj taitata, cambaj mamata alicachingui.

VI ¹³ Ama huañuchinguichu.

VII ¹⁴ Cazarashca jahua ama shujhuan causanguichu.

VIII ¹⁵ Ama shuhanguichu.

IX ¹⁶ Cambaj cumba runagutaca, ama yangata chashnapachami nishpa juchachishpa villanguichu.

X ¹⁷ Cambaj cumba runagupaj huasitapash, ama munanguichu. Cambaj cumba runagupaj huarmitapash, ama munanguichu. Paita servij jaritapash, huarmitapash, paipaj huagratapash, paipaj burrotapash, ashtahuan imatalla charishcacunatapash, chai cumba runagupajtaca ama munanguichu” nijurcami.